

2 Pegodo

cadota ante nänö ayænta yewæmongainta

Wængongui mīnitō imīnite waa cæcæcāimpa, ante

¹ Botō Timönö Pegodo inömo inte Itota Codito ingante nē cædömö iñömote tömengä botō imote da godongä godinque botō tömengä beyæ nē apænebo bagaboimpa. Mönö Wængongui inongä inte Itota Codito iñömö mönō imonte, Quëwencæmīnīmpa, ante nē Ængaingä ingampa. Tömengä iñömö mönitō imönite pönö cædinque, Mīni wede pönönö ante waa pönī entawencæmīnīmpa, ante pönongä ænimöni inte entawëmönīpa. Ayæ adobai tömengä nē nō pönī cædongä inte mīnitō imīnite pönongä æninque mīnitō mönitō entawönö bai ado mīni wede pönönö ante edæ waa pönī entawëmīnīpa. Inique mīnitō imīnite botō, Acæmīnīmpa, ante yewæmömopa.

² Mīnitō Wængongui ingante pönëninque Itota Codito mönō Awënë ingante adobai pönëninque tömëna inate edæ ate bai pönencæmīnīmpa, ämopa. Ayæ tömëna godömenque pönö cæda ate mīnitō tömëna nänä gänë pönönö ante edæ eyepæ pönī entawencæmīnīmpa, ante botō yewæmömopa.

Codito nänö nē ëmiñæmö inte mönō iūmai entawëmompā

³ Itota Codito iñömö, Nē waa cæbo inte botō ñäö ëmömo iñömote pödäni, ante mönō imonte do aa pecä pömompā. Mänömai Itota Codito weca pönömönte tömengä Wængongui nänö tæi pīñæmämo entawëmongä inte, Quëwëedäni, äninque eyepæ pönö cæcä ænte quëwëninque mönō tömengä awinca ate bai pönëninque tömengä nänö waa cædö bai edæ adobai mönō waa cæmö

bamompa. ⁴ Tömengä nē waa cædongä inte edæ ñäö bai emöningue, Botö godömenque nanguï cædinque waa pönï edæ pönö cæcæboimpa, ante edæ wæætē wæætē angacäimpa. Ìninqe mīnitö ññömö tömengä nänö angäinö ante wede pönēñöminite Wængonguï tömengä nänö entawönö pönongä æninqe mīnitö Wængonguï nänö entawönö bai adobai entawencæmīnimpa. Ayæ mänine ante wede pönëningue mīnitö inguipoga quëwëningue wënæ wënæ mönö cæinente wægäinö ante, Ñömænte bacæ wæ, ante wædinque Baa ante edæ aamö cæcæmīnimpa.

⁵ Codito mänömaï pönö cæcä beyæ mīnitö wede pönëmīni inte nē waa cæmīni bacæte ante cöwë edæ pæ pagænte cæedäni. Ayæ wææ nē waa cæmīni badinque Æbänö cæte nö cæquiï, ante ëñëmīni bacæte ante nanguï cæedäni. ⁶ Ayæ wææ mänömaïnö ante mīnitö nē ëñëmīni badinque godömenque nanguï cædinque nämä wææ aamīni bacæte ante cæedäni. Ayæ wææ nämä wææ aamīni badinque wæætē nē wæntædämaï inte ee cæmīni bacæte ante cæedäni. Ayæ wææ nē wæntædämaï inte ee cæmīni badinque mīnitö wæætē Wængonguï nänö ante entawönö bai entawëningue tömengä nänö cædö cæte quëwencæte ante cæedäni. ⁷ Ayæ wææ Wængonguï nänö cædö bai cæte quëwëmīni badinque mīnitö ayæ, Mönö caipæ, ante godongämæ mīni waa cæcabo bacæte ante cæedäni. Ayæ wææ mīni godongämæ waa cæcabo bamīni inte mīnitö ayæ waodäni tömänäni ñänite waadete pönëningue godö waa cæmīni bacæte ante cæedäni.

⁸ Mänömaï wede pönëningue täï ongöningue waadete pönëningue Wængonguï nänö cædö ante godömenque godömenque entawente cæmīni ñninqe mīnitö mönö Awënë Itota Codito ingante ate bai nē pönëmīni inte edæ tömengä beyæ mīni cæquënönö ante oda cæte wædämaï

imaiminipa. Wæætē edæ awæ nanguī inca baī mīnitō adobaī mīni cæquēnēnō ante do cæcæmīnimpa. ⁹ Wæætē māninō tōmānō ante entawēnāmaī ingā guiquēnē tōmengā mōwoyata baī ēmōnongā inte inguipogaque waa adinque öönædē iñömō gobæ i ædō cæte aquingää. Tōmengā nānō wēnæ wēnæ cægaīnō ñā do mēnongate impa, ante pōnēnāmaī inte önonque quēwengampa. ¹⁰ Iñānāni ēñēedāni. Wængonguī mīnitō imīnite do apænte ænīnque aa pegacāimpa cæmīnii. Mīnitō, Wængonguī nānō änōnonque ante ēñente entawēnīnque mōnō cōwē tæī gongænte ongongæīmpa, ante nanguī cædāni. Edæ mānōmainonque ante cæmīni inte mīnitō oda cædāmaī inte tæī ongoncæmīnimpa. ¹¹ Ayæ iñcayæ ate nāñe wæmīni ate mōnō Awēnē Odeye Itota Codito iñömō mīnitō imīnite ææntodongā goyōmīnite tōmengā, Pō guidāni, ante watapæ æmæwo manguicā guite cōwē quēwencæmīnimpa.

¹² Mīnitō māninō ante do ēñēnīnque mīni nō pōnī ēñēnō ante ædæmō entawente tæī ongōmīni incæte botō, Godōmenque cōwē pōnencæmīnimpa, ante cædinque adodō adodō ante apænebo ēñencæmīnimpa. ¹³ Edæ botō, Mīnitō oda cædāmaī inte cōwē pōnencæmīnimpa, ante cædinque botō baonga botō quēwenganca wæætē wæætē apænedinque nō cæte apænebopa, ante pōnēmopa. ¹⁴ Edæ mōnō Awēnē Itota Codito botō imote edonque apænedinque, Bitō oo pōnī wæninque botō weca ææ poncæbiimpā, angacāimpā. ¹⁵ Angā ēñengaimo inte botō, Ñōwo botō yewæmōninō ante adinque entawēmīni inte mīnitō iñömō botō gobo ate cōwē pōnencæmīnimpa, ante cædinque ñōwo incæ tæī pīñæninque nanguī cæcæboimpā.

Itota Codito Tæiyæ Awēnē nānō ēmōnō atamōnipa

¹⁶ Mönö Awënë Itota Codito iñömö tæi piñængä ingä inte oo poncæcäimpa, ante minitö iminite apænedinque mönitö dicæ wadäni nāni mā apænewënö ante apænetamöniyaa. Wæætë edæ, Tömengä nē Awënë iñongä inte mönō Tæiyæ Awënë nānō ëmönō incæ ëmongampa, ante nē agaimöni inte mönitö, Nāwangä agamönimpa, ante apænemöni ëñëminitapa. ¹⁷ Edæ Awënë nānō ñäo apäite bai ongöñömö ongonte apænedinque Mæmpo Wængongui incæ, “Iingä botö Wengä iñongä inte botö nē waadecä ingampa. Tömengä ingante adinque botö waa tobopa,” ante apænegacäimpa. Ayæ Itota ingante waa adinque tömengä nē ñäo ëmongä ingante odömongä agamönipa. ¹⁸ Änanquidi tömengä tæiyæ waëmö ëmonte nānō ongöñömö godongämæ ongöninque mönitö mäninö ante Wængongui öönädë tedecä ëñentamönipa.

¹⁹ Wængongui beyæ nē apænegaināni nāni yewæmongainö bai mönitö adobai edonque agaimöni inte, Nāwangä iñonte yewæmongadänimpa, ante apænemöni ëñenguënëmini iminipa. Mäninö nāni angainö wëmö iñömö ñäo apäite tica ënente bai i apa quëwëminii. Oque pönente iñonte, Wadaamö æængäimpa, ante wänö cönäni bai minitö adobai mini ñäo entawenguinque ante Itota Codito nānō ponguiönæ ante edæ wänö cöninque wede pönëmini ininque waa imaimpa. ²⁰ Iñänäni ëñeedäni. Dodäni Wængongui beyæ nē apænegaināni incæ, Wængongui æbänö ante apænegä ëñente yewæmonguimoo, ante pönëninque dicæ mā pönëninque adodeque incæ yewæmongadäniyaa. ²¹ Wiñ nāmanque pönëninque yewæmongadänimpa. Wæætë Wængongui Tæiyæ Waëmö Önöwoca nempo quëwëñönänite tömengä pönö apænegä ëñëninque Wængongui nānō apænedonque ante apænegadänimpa, ante ämo ëñëmaiminipa.

2

Nē babæ odömönte apænedäni iümaï cædänipa, ante

¹ Doyedē pancadäniya, Wængongui beyæ apænebopa, äninque babæ apænegadänimpa. Nöwo iñömö wadäni adobaï awëmö cædinque, Mïni cabo oda cæte ewente wæcæminimpa, ante cædinque babæ ante odömönte apænequinäni minitö weca do ongönänipa. Mönö Tæiyæ Awënë incæ tömënäni inänite æncæte ante nämä wepæ nē godongaingä iñongante tömënäni wæætē nāni quingæ ömæe ewenguinque edæ Baa änänipa cæminii. ² Pancaminiya nanguï imïni incæ mini guiñente wæquinque tömënäni nāni wentamö mongænte goquinö incæ tee empote goquimïni iminipa, ante awædö. Mäninö godinque mönö nöingä eññönö ante piinte cæyömïni wadäni adobaï mänii taadö nöinö iñonte godö babæ äninque wænæ wænæ änäni baquïnänimpa, ante awædö. ³ Nē babæ odömönte apænedäni iñömö minitö mäincoo ante ö æinewente wæwënäni inte nämäneque nāni pönëwënö ante tededäni eññinque minitö do oda cæyöminite tömënäni wæætē ö æmainänipa, ante awædö. Mönö nē pangä önoncadopo do ongongaïnäni inänipa. Mönö nē pangä iñömö, Oo nāni ewenguinque mänömaï cædänipa, ante apænte ancæte ante piiniquede edæ möwo mönämäï mïingä inte a ongongampa.

⁴ Anquedoidi incæ eññämaï cædäni ate Wængongui ata cæpodämaï ingacäimpa. Wæætē, Tömënäni nāni apænte tente wæquinganca ontatodē wëmö mäe mämönte baï iñömö gui tee mönete ongoncædänimpa, ante cædinque tömengä angä eññente tömënäni nāni owogaiñömö tadömengadæ pönï dobæ go guigadänimpa.

⁵ Ayæ doyedē tömengä nänö nē badongainäni ingui-poga quëwëñönänite Wængongui tömënäni inänite ata cæpodämaï inte angä ate nē eññämaï inäni iñömö edæ

æpæmpo bete wængadänimpa. Wæætë Nöwee wodi Docä nani änongå guiqüenë, Mönö nö cæte quëwengæimpa, ante në apænegaingä iñongante Wængonguï tömengä tönö tiæte ganca inäni mänimpodänique inänite wææ aacä quëwengadänimpa. ⁶ Ayæ, Todömä tönö Gömoda iñömö quëwënäni inänite, Mini apænte wido cæquinque, ante tömënäni quëwëñömö iya täninque wido cæcä gö-naiboque bate contagatimpa. Mänömaï cædinque Wængonguï, Botö imote ëñënämaï imini mini adobai tente wæquinque cæminipa, ante wadäni inänite odömoncæte ante cægacäimpa. ⁷ Ayæ ëñënämaï inte cädäni baonque towente quëwënäni adinque Dooto wodi iñömö në nö cægaingå inte, Wentamö pönï mongænte quëwënäni awædö, ante wædongä inte adoyömö quëwëñongante Wængonguï tömengä ingante töö æmænte ö ængä beyænque quëwengacäimpa.

⁸ Tömengä waa cæquinque nö entawënongå inte tömënäni weca quëwente ayongä iimö iñö iimö iñö ëñënämaï cädäni adinque tömengä, Ancaa ate awædö, Ancaa ëñente awædö, ante wæwëñongante Wængonguï tömengä ingante do ö ængä beyænque quëwengacäimpa. ⁹ Mänömaï cædinque Wængonguï, Botö miñæ në pönäni caate wædäni adinque botö do ëñente cædinque æmo ate quëwënänipa. Wæætë wiwa cädäni inänite botö apænte angüönæ ganca mö ongonte bai mäninque ñowo incæ wæætë wæætë pämo wædänipa, ante Wængonguï cæcampa. Ininque, Nö ëñente Wængonguï cæcampa, ante mönö edonque ëñengæimpa. ¹⁰ Mänii babæ ante në odömonte apænewënäni iñömö tömënäni baonque ante towëinente nani entawëmämo ante në cädäni inönäni inte edæ awënëidi inänite, Wiï ëñëinë wædö, ante piinänipa. Mänömainö ante në piinte änäni inänite godömenque pancæte ante Wængonguï mö ongonte bai mangampa. Tömënäni iñömö nämä ængö cædinque

guiñenedāmaï inte edæ nē ñäö entawente täï emönāni inānite godö wënæ wënæ apænedinque edæ babæ ante tedewënānipa. ¹¹ Ìñæmpa anquedoidi täï piñænāni inte godömenque ñænænāni inönāni incæ Wængongui ayongante guiñenete wædinque nē ñäö entawente täï emönāni inānite piinte apænte änāmaï inānipa.

¹² Nē babæ ante odömönāni guiquënë tömēnāni nāni nē adāmaï inö ante mä pönēninque wënæ wënæ apænedinque babæ ante tedewënānipa. Babæidi ömæwocādāni inte nāni togænte ecate ewenguinque önonque pönï cægönāni bai nē babæ odömönāni iñömö edæ adobai eñenāmaï ināni inte tömēnāni nāni wænguinque babæ cædinque quingämē bai quëwënānipa. ¹³ Tömēnāni wadāni inānite godö wiwa cædāni ininque iināni wæætē näëmæ godö cædāni wæcædānimpa. Tömēnāni iñömö, Itædē incæ mönö baonque pönente towengæimpa, ante cædānipa. Minitö waadete pönēninque godongämæ cæñömīni tömēnāni adoyömö pöninque cæowæo incædö beowæo incædö inte cæyönāni wentamö nāni mongænö beyænque mīni cabo wæætē baate bai eñamīni badinque wentamö tæ encaa tæ encaa emonte bamīni awædö.

¹⁴ Wacä onquiyængä awinca adinque cöwë godö towëinente wædāni inte tömēnāni iñömö ñimpo cædāmaï cöwë wiwa cæinente wædānipa. Wacä aquīi piñænāmaï ingä adinque tömēnāni, Mönitö tönö godongämæ ponte wënæ wënæ cæcæcäimpa, ante cædinque godö waa cæte bai babæ cædānipa. Botö qui botö qui, ante nē æinente wædāni inönānite Wængongui iñömö, Tömēnāni nāni wæwocaincabo inānipa, ante piinte angampa. ¹⁵ Taadö töinö oda cædinque edæ docä Beodo wodi wengä Badäo wodi miñæ tömēnāni tee empote godānipa. Tömengä Badäo iñömö, Nö cædāmaï imo incæte botö mæincooque ænte tobote, ante bai cægacäimpa. ¹⁶ Tömengä Wæn-

gongui beyæ nê apænecä incæ ocai ömæcacä bai inte wapiticæ ëñenamai cæyongante babetadecä iningä incæ bodo incæ iñontobæ wao bai tededinque Badäo ingante wææ angacäimpa.

¹⁷ Mänii ñöwodäni nê babæ odömönäni iñömö æpæ taquënëñömö æpæ dæ ä bai edæ önönäni que inte odömönänipa. Boguimancoo wini cai mongænte önonque ænte poncoo bai tömënäni adobai inäni inte önonque cædänipa. Mänömai cædäni beyæ Wængongui, Tömënäni nani ongonte wæquiñömö, ante mæ mämönte bai iñömö badongacäimpa.

¹⁸ Edæ tömënäni ogæ tededinque, Botö godömenque waa pöni cæbo aedäni, ante önonquedö ante tedewënänipa. Wädäni wapiticæ cæte quëwënäni nempo adocanque wodo aamö cæyongante mäninäni nê babæ odömönäni iñömö, Bitö mönitö miñæ wæætë pöninque baonque bitö cæinëwënö ante guiñëñadämai inte cæte tocæbiimpa, ante waa cæte bai godö babæ cædänipa.

¹⁹ Mïni ædæmö aamö cæte mönedämai quëwenguinque mönitö miñæ pödäni, ante babæ änewënänipa. Incæte nê babæ odömönäni incæ tömënäni nani wiwa cædonque beyænque cæte quëwënäni beyænque näëmæ ñä cæyænte bai inte wædänipa. Edæ quiëmenque ante waocä ëñente cæcää tömengä mäninö nänö ëñente cædö beyænque nê cæte quëwënongä inte näëmæ ñäö cæyænte bai inte wæcampa.

²⁰ Inguipoga ñömænguënëmämo beyæ tee mönete bai quëwëninäni inte tömënäni mönö Awënë Itota Codito mönö imönte nê Ængaingä ingante do ate bai pönëninque edæ abæ tawænäni inänitapa. Mänömai abæ tawænte godinäni inte tömënäni inguipoga ante nani cæinente wæpämö beyænque wæætë adodö go goyo cæte ægodawate tæ wææntodönte bai wædäni ininque

tömēnāni godōmenque nāni wēnæ wēnæ wæwenguinque imaimpa. ²¹ Nōinō taadō do adināni inte tōmēnāni nāni godōmenque wæwenguinque ēmō cæte godānipa. Wængonguī tæiyæ waēmō nānō wææ angainō ante odōmōnāni nāni do ēñēnīnō ante Baa ante wadæ godāni iñōmō godōmenque wēnæ wēnæ nāni wæquinque impa. Inique mānīnō taadō ante tōmēnāni cōwē adāmaī ināni inte bai tōmēnāni beyæ godōmenque waa incædōnimpa. ²² Tōmēnāni nōinō taadō ēmō cæte godīnāni nāni cædō bai ante iīmaīnō ante nāwangā ante badete todānipa. “Guinta awæ wēningā adodō cængampa. Odæ wængānā iñōmō æpæ pantate ate onguipoipæ wēango wēango nangampa.”

3

Mōnō Awēnē wæætē adodō poncæcāimpa, ante

¹ Botō nē waadedōmīni ēñēedāni. Mīnitō mōwo mōnāmaī inte nōingā ante pōnencæmīnimpā, ante botō, Mānōmaī impa, ante mentaa yewæmōninque adodō adodō ante yewæmōmo aedāni. ² Tæiyæ waēmō entawēnāni Wængonguī beyæ ante apænedinque nāni yewæmongainō ante nē adimīni inte mīnitō wæætē pōnencæmīnimpā, ante cæbopa. Mōnō Awēnē mōnō imonte nē Ængaingā inte adobai ante wææ angacāimpa. Tōmengā nānō da godongaīmōni iñōmō tōmengā nānō wææ angainō ante apænemōni ēñēmīni inte mīnitō wæætē adodō ante pōnencæmīnimpā, ante cædinque yewæmōmopa.

³ Iīmaī ante tāno apænebo ēñencæmīnimpā. Mōnō waocabo inguipoga mōnō quēwēmāmo wodo iinque bayonte nē badete todāni cōwē poncædānimpā. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquināni inānipa. ⁴ Tōmēnāni iīmaī ante badete tocædānimpā. “Codito nānō ponguinque

impa, ante wædänitedö abi. Iñæmpa Wængongui nänö badongäñedë inguipo nänö cægai bai mæmæidi wodi wænte godäni ate ñöwo ganca adobai inte cæ apa guiñewëminii,” ante badete toquinäni inte poncædän-
 impa. Apænebo ëñeedäni. ⁵ Wængongui iñæmpa adod-
 eque angä beyænque öönædë owocoo edæ do bagatimpa. Adodeque angä beyænque onguipo æpæ tæcæpæno odæ yate ongöñonte tömengä æpæ tönö badongä ongompa. Mänömaï impa, ante edonque i incæte tömënäni, Mönö Baa angæimpa, ante beyænque adämaï inte bai pönënä-
 maï inänipa. ⁶ Ado æpæ inguipoga mæ ä beyænque Nöwee wodi quëwengäñedë mäninguipo nänö ingai dæ badinque waguipo bai bagatimpa, ante edæ ñöwodäni iñömö adobai pönënämaï inänipa. ⁷ Ayæ adobai Wængongui adodeque angä beyænque öönædë owocoo tönö iinguipo ñöwo mïni cægonguipo edæ iya tanguinque ongompa. Tömengä, Botö imote në Baa änäni inänite botö apænte pante wido cæquiönæ ganca mänii öönæ tönö iinguipo ongompa, angampa.

⁸ Botö në waademini edæ ëñeedäni. Mönö Awënë ayongante adoönæque incæ edæ, Miido ganca wadepo bai impa, ante acampa. Miido ganca wadepo iñonte mönö Awënë ayongante, Adoönæque bai impa, ante acampa. Mänömainö ante adodeque incæ minitö cöwë ëñente pönëedäni, ämopa. ⁹ Mönö Awënë, Cöwë pönö cæbo æncæminimpa, ante nänö angainö ante pancadäniya, Æiquedö mönö Awënë cæquiringäa, ante wædänipa. Mönö Awënë iñæmpa wiï wæntæye ingampa. Wæætë, Adocanque wænämaï incæcäimpa. Wæætë tömänäni, Idæwaa wënæ wënæ cæte awædö, ante botö gämænö poncædänimpa, ante cædinque tömengä mäninö beyænque ee cædämaï ingampa. In-
 inque tömengä, Minitö wæætë botö gämænö æiquedö

ponguimīnii, ante wānō cōninqe edæ ee pōnāmaī ingampa.

¹⁰ Incæte nē awēmō ö ængā iñontobæ nānō pōmaī mōnō Awēnē nānō poncæ cæōnæ iñōmō adobaī iñontobæ ponguīnō anguēnē. Nanguī tæi tæi tēninqe öönædē owocoo incæ iñontobæ dæ goquinō anguēnē. Gongā nāni angā nanguī pōni bæco īninqe edæ Wængonguī nānō badongaincoo tōmancoo edæ aca podinque edæ ewente bacæimpa. Inguipoga tōmāo ongoncoo dæ ba īninqe inguipo öñōmæca pōni baquinō anguēnē.

¹¹ Tōmancoo edæ mānōmaī ewenguincooque impa, ante adinqe edæ mīnitō iñōmō, Æbānō quēwenguīi, ante pōnēmīni. Wængonguī nānō cædō baī cōwē cædinque tæiyæ waēmō quēwenguēnēmō imompa. ¹² Wængonguī nānō ponguīōnæ iñōmō edæ æyedēnō ponguīi, ante wānō cōninqe, Quingæ pōni pongæimpa, ante mōnō nanguī cæcæimpa. Māniōnæ iñonte edæ öönæ incæ gongā bæcote ewente bayonte Wængonguī nānō badongaincoo incæ nanguī ocoi āninqe tōmancoo aca podinque ewente baquinō anguēnē. ¹³ Picæōnæ tōnō pedænguīpo ömæe ewēninqe Wængonguī wæætē, Botō mīiōnæque tōnō mīinguipoque pōnō badoncæboimpa, ante nānō angainō baī do badoncæcæimpa. Īninqe mōnō iñōmō, Mīiōnæ tōnō mīinguipo iñōmō mōnō nō pōni cæte quēwengæimpa, ante nanguī aīnente wæmompā.

¹⁴ Botō nē waadedōmīni ēñēedāni. Mānōmaī bacæimpa, ante nē aīnente wæmīni inte mīnitō iñōmō edæ, Mōnō māniñedē wentamō entawēnāmaī imō adinqe Wængonguī pīināmaī incæcæimpa, ante nanguī cædinque edæ nāmā wææ aaedāni. Ayæ tōmengā, Botō ayōmo waēmō ewocamīni īninqe edæ mōnō godongāmæ piyænē cæte quēwengæimpa, ante pōnō cæcæcæimpa, ante edæ nanguī cæedāni. ¹⁵ Mōnō quēwenguinque ante mōnō Awēnē edæ ee ongonte pōnāmaī ingampa,

ante pönēedāni. Wængonguī pönö cæcä ate ocai nē encacä bate pönēninque mōnō tōniñacä Pabodo mōnō nē waadecä inte adobainō ante mīnitō imīnite edæ, Acæminimpa, ante yewæmongantapa. ¹⁶ Wængonguī mōnō quēwenguinque ante ee pönāmaī ingampa, ante cadota ante yewæmōninque Pabodo adobainō ante edæ cōwē yewæmongampa. Tōmengä nänō yewæmōninta pancataa wīi edonque ī adinque nē ēñēnāmaī ināni tōnō aquīi pīñænāmaī ināni iñōmō edæ oda cædinque wapiticæ odömōnānipa. Tömēnāni edæ Wængonguī angä ēñente nāni yewæmongainta tōmantaa adobaī adinque tōmēnāni nāni æmæwo ēwenguinque edæ wapiticæ odömōnānipa.

¹⁷ Botō nē waademīni ēñēedāni. Mänōmaī impa, ante do ēñēmīni iñōmīnite Wængonguī nänō wææ angainō ante ēñēnāmaī cædāni ināni guiquēnē mīnitō imīnite tōō æmænte wapiticæ ænte gocæ cædāni ate wæd-inque mīnitō wæætē tōmēnāni miñæ godāmaī iedāni. Wæætē edæ Tæiyæ Awēnē nempo quēwēmīni inte, Tæi gowæænāmaī incæboimpa, ante nāmā wææ aedāni.

¹⁸ Mōnō Tæiyæ Awēnē Itota Codito ængä beyænque mōnō quēwēmōmpa. Ininque tōmengä waadete pönö cæcä ate mīnitō tōmengä ingante ate baī pönēninque wadāni inānite godōmenque waadete godō cæmīni baedāni. Tōmengä iñōmō edæ ñōwopāmo iñonte wapāmo miimāmo iñonte edæ cōwē tæi ēmongä inongä inte ñāō apāite baī ēmongampa, ante adinque mōnō ñimpo cædāmaī inte tōmengä ingante cōwē waa acæimpa. Mänōmaī baquīnō anguēnē, ante botō, Amēē, amopa.

Wængongui nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

